

## **Y Lleuad a'i chydymaith (020109)**

Gyrru adref hen grwydryn?  
Heno dros fro a dros fryn  
Yn dy wen weli Wener;  
Llywydd a fydd am awr fer.

(Ymgais *numero uno*! Y Lleuad a Gwener yn agos at ei gilydd ar ddiwedd 2008)

## **Alwen (020109)**

Mae grisial lle bu'r Alwen,  
A rhos dlos dan rewlyd len;  
Ias y gaeaf yn gafael,  
Ac mae'n haf mewn cwmni hael.

(Cerdded o gylch yr Alwen gyda Robin a'r criw ar Ddydd Calan 2009)

## **Nadolig (020109)**

Yn llawen ar ddydd ein Llywydd - a gwyl  
Y geni rydd adenydd,  
Cwyd y gred fel ehedydd!  
Ond y cnawd yw ffawd pob ffydd.

(Gobaith yn diflannu unwaith eto wedi hoe'r Nadolig)

## **Taid Ty'n Y Wern (010209)**

Ers tro yn bencampwr straeon - o hwyl  
A helynt hen borthmon,  
Ym myw pob lliw y teulu llon  
Gaf eto gofio Eyton.

(I gofio am Taid; ges i docyn llyfr wrth Gaynor ar ol codi'r canu yn yr angladd; prynais Odliadur)

## **Myfi (010209)**

A deimli rymoedd myfiaeth - trachwant  
Yn trechu'r ddynoliaeth?  
Arian gau o'r werin gaeth,  
Yf o lif gyfalafiaeth!

(Y wasgfa arianol ar ei waethaf yn 2009, a rhwystredigaeth am dwpdra Shell)

## **Godre'Graig (010209)**

Yn wyddon ar wawrio 'nyddiau - torrodd  
Taren rym fy maglau.  
Nawr mae mor dwym yn rhwymau'r  
Graig glyd, o'r byd, a'm hoff bau.

(Rhywbeth i lenwi ffram yng Ngodre'rGraig)

## **Huanfa (080209)**

I ganolbarth gain Alban - mae Auchter  
Muchty'n hoffus dreflan,  
I'n ffrindiau cu mae'n huan,  
Braf fel mel yr haf yw'r man.

(Cysgu dros nos 'da Eryl a Rob cyn cyfweliad Katrin yn St Andrews ar 11 Chwefror 2009)

## **Niccolo (180209)**

Nefolaidd Machiavelli - tasai'r  
"T'wysog" heb ei eni,  
Byddai'n buddion yn boddi  
Yng ngwaed oer dy angau di?

(Darllen "Y Tywysog" gan Machiavelli tra'n ymweld â Phrag)

## **Puro (190209)**

Cilcyn i gynnau coelcerth - i wared  
Y werin o'r diwerth.  
Ond i'r neb fu'n llond ei nerth,  
Pair i adfer y prydferth.

(Anobaith sefyllfa economaidd a chymdeithas yn gyffredinol yn mynd yn drech na fi!)

## **Harrachov (200209)**

A'r erwau'n wyn mae'r eira'n annwyl - nef  
I'r nifer sy'n disgwyl  
Gwers deinameg cyn egwyl  
O win ar y ffin a Phwyl.

(Cofio'r tridiau yn sgio yn Harrachov ar y ffin a Phwyl yn yr eira mawr - yr eira a'r sgio'n ddibaid, a'r gwin twym yn llifo!)

## **Gyrru (010309)**

Gwyri'n hwylus drwy gorneli - stormus  
Dros darmac fyth byddi!  
Rheola'r seiniau rali:  
Rhydd y taw dy drwydded di!

(Katrin yn dysgu gyrru - cynghanedd draws ym mhob llinell!)

Gyru'n ol drwy gorneli - a'i stormus  
Darmac, bydded iti  
Yr hwyl ar ol y rali!  
Rhwydd y daw dy drwydded di!

(Gwelliant gan Robin 20090301 - well gen i'r gwreiddiol, maen herio mwy)

## **Stadiwm Liberty (20090305)**

Abertawe biau'r tywyrch - wyneb  
I wynion yr Elyrch;  
Olrhain chwarae cain yw'r cyrch,  
Gwir eiconig yw'r cynnyrch.

(Meddwl am fynd i weld y Swans yn erbyn Crystal Palace yn y Championship, ar ol iddyn nhw dod yn ol o ddwy gol i lawr i gael gem gyfartal yn Derby y noson o'r blaen)

## **RADAR Cariadon (20090321)**

Uffern achwyn ffroenuchel - a mwydro  
Yw modrwy mewn bogel!  
Anoeth dwyn genethod del,  
Gwell dewis un gall, dawel!

(Ymgais bod yn ddoniol. Duw a wyr pam y dewisais y pwnc. Robin yn son fod  $d+d=t$  i rhai ond nid iddo fe)

### **Bwydo'r canibal (20090327)**

Molawd cnawd yw can Idwal - ei glwyfog  
Ysglyfaeth yn fwytal  
Organaidd, oer i gynnal  
Cinio bach i'r canibal

(Dydd Sadwrn 21 Mawrth es i 'da Katrin i Gricieth. Ei her i mi oedd creu englyn am ganibal. Cofiasom am siwrnai un tro i Gwm Idwal yn Eryri - a dyna'r hanes yn dechrau: Mae Idwal yn canu clodydd y canibal ac yn mynd a thamaid iddo i gadw'n dawel - fel fi a chanibal Shell)

### **Sul Y Palmwydd (20090406)**

Yn nagrau oriau unigrwydd - daw grym  
Dy groes, Iesu'n Harglwydd,  
O gofio'r salm a'r palmwydd;  
Ceraist a rhoddaist yn rhwydd.

(Dechreuais ar hwn yn ystod pregeth Sul Y Blodau)

### **Ynys Hedd (20090417)**

Ar draeth ochr draw i'r dref - anadlais  
Hen odlau fu'n adlef  
Yn naddion byd anaddef.  
Es o'r niwl yn nes i'r nef.

(Ar ol darllen Ynys Hedd gan Crwys ... o Gwm Tawe wrth gwrs! Dwi 'di gwneud ton ar gyfer y pedwarawd i eiriau Ynys Hedd, ac fel epillog byddwn yn canu:

Anadlais hedd yn adlef  
Ar draeth ochr draw i'r dref.  
O naddion byd anaddef,  
Es o'r niwl yn nes i'r nef

... neu debyg!)

### **Dant Y Llew (20090420)**

Enw crand ar flodyn croendew - carreg  
Mewn corwynt a llwydrew,  
Yn gerflun uwch y gweirflew:  
Haint y llawr yw dant y llew!

(Ar ol garddio yng Ngodre'rGraig a thynnu mil ohonynt o wair y lawnt!)

### **Scott a Kelly (20090424)**

Curo'n llon mae calon Kelly - a'i gŵn  
Yn gwenu amdani,  
Paradwys yw priodi  
Y dyn i droi dau yn dri!

(I ddathlu priodas Kelly (merch fy nghefnder o'r Rhondda) a Scott yng Nghaerdydd ar Mai 23 - ysbrydolwyd wedi cwrdd a'r prifardd yn ei siwt ar lwybr Brynhyfryd)

### **BrenhinesYGwyddorau (20090506)**

Rhodd annwyl yw barddoni - Er mantais  
Rhamantus yr odli,  
Moethus mwyn yw maths i mi:  
Rhagluniaeth o raglenni!

(I esbonio paham mai'r ystadegau nid yr odli cafodd fy sylw'r penwythnos diwethaf!)

### **Deall (20090511)**

Diben dod i ben y daith - nid dychryn,  
Ond dechrau gweld cywaith  
Sawdd ym mer yr oesoedd maith:  
I orffen, pawb yn berffaith.

(Duw a wyr beth oedd yr ysgogiad, oeddwn yn hapus fy myd yn ysgrifennu hwn!)

### **Twm (20090514)**

Calon a'i drons mewn cwlwm - yn gadarn  
Dan godwm afreswm,  
Yn berlen sy'n llawn bwrlwm,  
Fflam y tad a'r fam yw Twm.

Calon a'i drons mewn cwlwm - ond ceidwad  
Cadarn adeg codwm,  
Cennad mwstwr a bwrlwm,  
Fflam y tad a'r fam yw Twm.

(Penblwydd Twm ymhen ychydig ddyddiau - ceisio dal y ffaith ei fod yn ddidrefn, yn feddyliol gryf ac yn annwyl ar yr un pryd)

### **Cwrdd (20090520)**

Amser i adfer yw'r oedfa - defod  
Ufudd teulu Adda,  
Awr ber i dorri bara  
A gweld dyn drwy'r Bugail Da.

(John Gwilym Jones yn dweud mae myfyrio, cwrdd a chanllaw'r Beibl yw sail bywyd moesol)

### **IaithYDê (20090526)**

Mae hwntw yn wilmentan - yn citsho,  
Moyn cwtsho a chônan,  
Yn wêro lot a wâre lan;  
Clywaf, cofiaf y cyfan.

(Twm wedi mynd i aros 'da Dadcu - hiraeth ar y tad)

### **MerchYFfair (20090527)**

I brynu hoen y BRUNETTE - un ffroesen  
Ffair hyson mewn PUNNET,  
Râs o iâs tu ôl i'r iet:  
Hen grempog drodd yn GRUMPET!

I brynu hwyl 'da'r brwnét: un o ffroes  
Ffair Rhos, os hoffet  
Râs o iâs tu ôl i'r iet,  
Y crempog efo'r crympet!

I brynu hwyl 'da'r brwnét: un o ffroes  
Ffair Haf, ac mi ddylset  
Gael ras iâs tu ôl i'r iet:  
Y crempog ddyrru crympet!

(O faes Eisteddfod yr Urdd ger Canolfan Y Mileniwm)

### **Adolygu (20090530)**

Pwysau prin pasio praw - onid galwad  
O goleg sydd gerllaw?  
I fun ddewr, yn fuan ddaw  
Llonder o'r dwyster distaw.

Pwysau prin pasio praw - ond cei alwad  
Y coleg, wyt ddeunaw!  
Benyw deg, buan y daw  
Llonder o'r dwyster distaw.

(Katrín yn adolygu ar gyfer lefel A)

### **Pedwarawd (20090607)**

Salam rwydd â'r sawl amryddawn - canu  
Cynnil tyf fel gwinrawn,  
Cywir odlau, cariadlawn  
Hwyl yn wir, a theimlo'n iawn!

### **Pedwarawd (20090607)**

Salam rwydd â'r sawl amryddawn,  
Canu cynnil fel gwinrawn,  
Cywir odlau sain cariadlawn,  
Hwyl yn wir, a theimlo'n iawn!

(Ymarfer 4awd yn codi calon yn ddi-ffael - I dôn Stuttgart)

### **ColliDad (20090709)**

Daeth dy fywyd, a byd, i ben - angau  
Fy angor a'm hawen.  
Yn gorffwys wedi gorffen,  
Byddi gyda mi. A-men.

### **CyngerddYrUndeb (20090719)**

Gwenir ar Einir ac Ann - rheolwyr  
Yr Aelwyd a'r Adran.  
Daw pob llwydd yn rhwydd i rhan  
Cewri aur corau arian!

(I ddathlu llwyddiant Cyngerdd Undeb Yr Annibynwyr a gynhaliwyd ar 17 Gorff. gyda'r adran a'r aelwyd yn flaenllaw.)



### **TorriPerth (20090720)**

Antur pur torri perth - dwli difa  
Dail diafol diwerth!  
Clyw fy llef, Duw nef, am nerth -  
Un anfad yw'r pren anferth!

Natur poen yw torri perth - yn difa  
Dail diafol diwerth!  
Clyw fy llef, Duw nef, am nerth -  
Un anfad yw'r pren anferth!

(Wedi treilio oriau yn torri'r berth heno! - Robin ddim yn hoffi gair cyrch 4 sillaf)

### **Adfywiad (20090722)**

Tawel yw'r capel a'r cwrdd - Tyrd allan,  
Hen gwpan, o'th gwpwrdd!  
Cwffia! Cwffia nes cyffwrdd  
Â blagur Beibl ger y Bwrdd.

(Galw am adfywiad moesol a Christnogol)

### **Alaw'rGlaw (20090730)**

Yr haul ar ffo o'r aelwyd - cwyd achwyn  
Cadachau ag annwyd.  
Try ffars yn stori arswyd  
Pan ddaw alaw'r glaw i Glwyd.

(Glaw mis Gorffennaf yn alegori i dristwch y teulu. Meddyliais am "A'r wers? Mae'n stori arswyd" am y drydydd llinell hefyd, ond mae "ffars" yn llawer ddyfnach - ac yn rhoi cyng. lusg i'r bennill!)

### **ColliDad (WrthRobin20090728)**

Mae 'na ddwyster nas sieryd - a galar  
Na all y galon ddwedyd  
Un gair, rwy'n fudan i gyd;  
Gwag wyf, wyf argae hefyd.

### **Arwyn (20090805)**

Wyt arwr, Robat Arwyn - cerddor  
A rheithor Côr Rhuthun,  
Hogyn du a gwyn a dynn  
Y nwyd o enau nodyn.

(I Arwyn ar ôl arwain y côr am y tro cyntaf yn yr Eisteddfod)

### **YGriafolen (20090806)**

Crefa olau criafolen - aeron  
Euraidd olau'r heulwen,  
Lapia'r haul holl ddail y pren,  
Daw hwyl i droi tudalen.

(I gofio ymweliad Eryl a Rob adeg Eisteddfod y Bala, cerdded i'r Ganolfan Grefftau a gweld criafolen yn ei gogoniant)

### **SinicBachYBala (20090807)**

Ai hwyl yw Gwyl y Galon - hen geidwad  
Y Gadair a'r Goron?  
Yn enw dysg, nid yw hon  
Ond gwae dan draed y drudion!

(Ymateb i Alwyn Humphries yn malu awyr o Faes Eisteddfod Y Bala)

### **Adfer (20090809)**

Yn dawel, daw y duwion - yn feirch  
O fôr Afallon,  
I adfer, yn dyner don  
I'm mywyd o amheuan.

## Iznájar (20090813-19)

Lloches i'r olewydd llachar - llwyni'n  
Seboni Sbaen liwgar.  
Creulon yw'r galon a gâr  
I achwyn am Iznájar.

Iznájar di-gloc-larwm - yn ystod  
Siesta gwlan cotwm,  
Wedi'r cwsg cyfodir cwm  
Sy'n berl o swyn a bwrlwm.

Yn berlen wych mewn sychder - yn ferw,  
Bydd farw ag amser.  
Dofi'r haul, dyfrio yw her  
Ei rhosdir yn ei graster.

Craster yn gartref i'r Cristion - Suliau  
Yw seiliau'r brodorion.  
Teg anian y tai gwynion -  
Gwlad o haul y Tad yw hon.

Saer oedd tad y gaer a'r twr - etifedd  
Tyfiant y Rhufeinwr  
Oedd heb fargen â'r Henwr -  
Yn ôl i'r mosg elai'r Mwr.

Hedfan o'r Mwriad i'r Wladfa - paithau  
Poethion Patagonia  
Ym mynwes noethni Cesna;  
Ogof bryd, ac fe barha.

Ogof yn dwyn atgofion da - gwirion  
Haid Granada smala;  
Caerau hen Antequera;  
Cael hoe ym Mota Alcalá.

Diwedd i'r hoe a dyddiau'r ha' - hasta  
La vista, España!  
O fri Andalucía  
I Walia wen ag holá!

(Iznájar yw enw'r pentre yn Andalucía lle treiliom ein gwylliau haf. Anghaniadau: Iznájar = ith-NA-char; Mwr = mwwr; Cesna = CES-na; Granada = Gran-AD-a; Antequera = ant-i-CWER-a; Alcalá = al-cal-A; Andalucía = and-al-us-I-a; holá = ol-A)

## **LefelA (20090822)**

Ar ddresel dy lefel A - mae cychwyn  
A therfyn i'th yrfa.  
Aeron 'ddoe wnaiff 'fory'n dda  
Nawr cân dy gân a gwena!

Tyrd i ganfod her dy gynfas - a gwên  
I ganol cymdeithas,  
At nawn dy ddawn i'r ddinas.  
Cwyd dy rwyd o Glwyd i'r glas.

(Katrin yn llwyddo â'i lefel A ac yn dechrau meddwl am ei blwyddyn gyntaf (glas) yng Nghaerdydd (adar gleision))

## **YPianydd (20090825)**

Clyw y briw sy'n fyw a braen - swn Natsis  
Yn atsain ar feddfaen.  
Iddew'n stensh a'i eiddo'n staen -  
Eithr hil, maeth yr Almaen.

Hil yw brol y bwystfil braen - swn Natsis  
Yn atsain ar feddfaen.  
Iddew'n stensh a'i eiddo'n staen -  
Yn chwil o'i hil mae'r Almaen.

(Ar ôl gwyllo'r ffilm Y Pianydd gan Roman Polanski yn seiliedig ar hanes pianydd yn geto Warsaw)

## **OlionOlwen (20090827)**

Tan do aur ty tandwri - yn welw  
Aeth Olwen, gan boeri  
Croen o'i chyri oen a chri:  
I'r brain â'r biriani!

(Katrin a fi yn breuddwydio am fwyd yn ystod y siwrnai i lawr i'r de)

### **Godre'rGraig (20090901)**

Camau taeog Cwm Tawe? - tir aflwydd  
Cartrefle'n y Godre?  
Na! Nid tranc y llanc yw'r lle  
Ond burum, cennad bore!

(Cyfyng gyngor am GG; ceisio meddwl beth sydd orau i'w wneud â'r tŷ)

### **Maddeui! (20090903)**

I bwytho'r rhwyg â Bethan - yng ngalar  
Fy ngalwad, wyf wantan!  
Wyf leddf, a'm greddf yw griddfan.  
Gwnei faddau'm mau yn y man?

(Tynnu coes Bethan Tomos ar ol alwad ffon difyr! "Maddeui? Maddeui yn y man?" oedd yn wreiddiol, on RLI yn dweud mai r sill yma "ma-ddeu-i")

### **Torri'nRhydd (20090905)**

Dy gân ar dân yng Nghaerdydd - yn rhannu  
Yng nghanu Senghenydd.  
O danio cei rhwygo'n rhydd,  
O rannu, troi'n arweinydd.

(Meddwl mwy am Katrin yn y ddinas fawr)

### **YCapel (20090906)**

Gwelw hirnos galarnad - gwyngalchaf,  
Cwyrhaf teml cariad.  
Byw yw ty ein Duw a'n tad  
Â dolur drwy'r adeilad.

(Adwaith i bregeth ym Mhendref - y gweinidog yn sôn fod rhai yn hepgor gwasanaeth am eu bod yn teimlo'n drist o fod yn y capel)

### **EmynCoffa (20090922)**

Ai cyffordd emyn coffa? - ai pen taith  
Yw Pant-teg i'r chwildra?  
Diwedd dwys i'r dyddiau da  
Ai nawr yw gwawr y gwella?

(Emyn coffa dad dydd Sul ym Mhant-teg; Katrin wedi mynd i Gaerdydd; chwilio am oleuni)

### **YRebel (20090924)**

Arian byw nid 'deryn bach - yw Robin  
Rebel f'addysg bellach.  
Caf allu o'n cyfeillach  
I oedi, ac odli'n braf!

(Diolch i Robin am rhoi'r amser i'm helpu i englyna - a llais i mi fynegi fy nheimpladau)

### **Celain (20091009)**

O banic, awn yn benwan – o goelio  
Y gelain yn datgan  
Genynnau'r egwan anain.  
Ai dynol yw'r dwyfol dân?

(Katrin yn llewygu wrth gwrdd a'i "chorff", am y tro cyntaf. "Nid ergyd 'nabod organ" yn wreiddiol fel llinell olaf)

### **Gwrandawr (20091029)**

Â'i well yn bell o bwyllo - yn lleddfu  
Y lladdfa heb frwydro,  
Dyn y Tri yn Un pob tro  
Yw ffrind sy'n hoff o wrando.

(Colli swyddi yn Shell yn cymysgu â phregeth John Gwilym Jones ym Mhendref, fod grym gwrandawr yn fwy na'r holl siarad.)

### **DailYrHydref 20091031**

Dônt fel ton yn llon eu llef - aeth yr haf,  
Yn ei thro, am adref.  
Breuddwydion yn nofio'n nef  
Rhaeadrau dail yr hydref.

(Mynd am dro yng Ngodre'rGraig ar hyd yr hen rheilffordd).

### **GweldHadau (200901101)**

Cau llygad a gweld hadau - wy a sberm  
Yn y Sbaen am wyliau,  
Nos o hwyl a chynnes hau  
Yn enw eu genynnau!

(Robin yn gosod y pwnc, ac adolygu bywydeg Twm yn gosod y trywydd!)

### **Tân gwyllt! (20091107)**

O winllan ger y Fenlli - megis swyn  
O'n cadwyn rocedi:  
Ysbryd rhydd a sbri di-ri!  
Nesawn! Nesawn! Mae'n nosi!

(Twm a fi yn edrych ymlaen i fynd i Foel y Fenlli gyda Robin, Gwern ac Erin i gynnu rocedi ar noson tân gwyllt)

### **Ac a fydd byth (20091109)**

Di-derfysg a di-dyrfedd - yn ddi-arf  
Di-ddarfod gyfaredd.  
Di-droi wr di-drai ei hedd,  
Di-ddau yw a di-ddiwedd.

(Ar ôl pregeth Graham Floyd yn Mhendref y Sul diwethaf, adnodau o'r Hebreaid wi'n meddwl - a fu, y mae, ac a fydd ...)

### **MIT (20091120)**

I ddinas y gwyddonydd - ym Moston,  
Ymestyn adennydd  
Ac ysgwyd y rhwyd a rydd  
Aur o erwau'r lwerydd.

Wyneb ystyr yw Boston - hafan siwr  
Afon Sior ei chalon.  
Cymaint ei braint bod ger bron  
MIT, ym myd duwion.

(Cael y teimlad o fod yn rhan o fyd sy'n datblygu yn MIT ym Moston, ar lan afon Sior.  
Ymwelais â'r adran beirianeg elctronig lle bu yn o'r ystadegwyr mawr o'r enw Shannon  
yn gweithio)

### **Awen (20091122)**

Fel coflaid, gafael cyfle - i adrodd  
O Odre'r Graig, gwynfe  
Yn alaw'r afon Tawe  
A chaniadau doeau'r De.

(Ymweld â Godre'r Graig yn codi awen!)

### **Awen (20091122)**

Fel coflaid, gafael cyfle - rhoi geiriau'r  
Graig Arw, fy nghwynfe,  
Ar alaw'r afon Tawe  
Fel caniadau doeau'r De.

(Robin ddim yn licio'r toriad yn yr ail linell; hon yn osgoi hynny)

### **Ansicrwydd (20091128)**

Teimlaf wawl y diawl bach du - yn esgor  
Ar gysgod a dallu  
Deall iawn, nes ddyfod llw  
Angylion sy'n fy nghelu.

(Darllen Tudur Aled i gael syniad am y linell olaf!)



### **PikkuJoulu (20091129)**

Ar y Ffindir seilir sylw - nefoedd  
Hynafiad tir Turku,  
A'i gwneled diniwed nhw  
Yw calon Pikku Joulu.

(Dathlu Pikku Joulu - Nadolig Bach y Ffindir - gyda Huw a Bethan. Turku yw'r dref lle roedd Bethan yn byw yn y Ffindir. Mae'n rhaid cywiro'r sillafu Ffineg)

### **Tlodi (20091129)**

Yng nghanrif yr anghenraid - y llesgedd  
Yn llosgi ein llygaid,  
A heriwch chi'r llwch a'r llaid?  
Nid ynys ydyw enaid!

(Ar ol pregeth Mr Floyd brynhawn Sul)

### **Aderyn (20091203)**

Ag urddas yn ein gerddi - y cantor  
Cyntaf i'w drysori,  
Yr un fath â chath a chi  
Ag adain yn ei godi.

(Adar y bore'n canu'n yr ardd - y linell olaf gan Gwenallt, bron a bod)

### **SiopaNadolig (20091203)**

Râs hapus tymor siopa Nadolig  
A dwli marchnata -  
Po hwyred mae yn para -  
Popeth newydd, dedwydd, da!

(Y linell olaf yn ysgogi'r gweddill ymhen tair muned! Wyrld Recod!)

### **YParc (20091205)**

Gwelaf Garreg-Yr-Afon - yn gadarn  
Geidwad i'n chwareuon.  
Annwyl graig y criw pel-gron  
Yn gafael llw atgofion.

(Carreg-Yr-Afon yw'r parc yng Ngodre'rGraig lle'r oeddwn ac yr ydym yn dal i chwarae!)

### **NidWy'nGofyn (20091208)**

Arlwy mud yw'r perlau mân - o gyfoeth  
Daw gofid o bobman,  
Ond tôn a fodda'r cônan:  
Gelyn loes yw'r galon lân!

(Aralleiriad o'r emyn)

### **DrosLadd (20091208)**

Â'r byd i gyd yn gwaedu - er y sôn  
Gresynnaf o gredu,  
Yn hoglau noeth y gelyn hy,  
Mai'r rheswm yw yr Iesu.

(Newyddion am Affganistan ayyb a'r meddwl yn crwydro i'r "cyfiawnhad" dros rhyfel)

### **Mudo (20091210)**

Sioned, Mared a Mirain - â'r cyntaf  
O Landaf i Lundain.  
Rhyddid a rhoddid i'r rhain  
I foli deri'r dwyrain.

(Wedi clywed Mirain Haf yng nghyngerdd y côr nos Sadwrn, a'i bod hi wedi symud i fyw i Lundain)

### **Chwant (20091213)**

A wêl y byd â'r golau bant? Yn noeth  
Fel neithiwr gorweddant;  
Yn ddryslyd o'u chwyslyd chawnt  
Mae'r ddau yn rhwymau rhamant.

(Jana'n tanio'r dychymyg!?!)

### **NadoligGwyn (20091220)**

Odlau coll Nadolig gwyn - yn goflaid  
Sy'n gyflawn dros Rhuthun,  
Erys hud y grasau hyn  
Fel heddiw hyd y flwyddyn?

(Dihuno i weld eira, mynd am dro gyda Twm a meddwl fod y byd yn ei le)

### **DiweddYrEira (20091223)**

Codwm a'r cwm mewn coma - myfyrdod  
I'w ganfod mewn gwynfa,  
Elor arian plu'r eira  
Yw da bo drud byd yr iâ.

(Gweld yr eira'n diflannu'n araf deg)

### **Boiler (20091225)**

Mae criw'r Williams bob amser - yn dwli'r  
Nadolig a'i ffraethder,  
Cânt fwynhau trysorau'r sêr  
Heb olau yn eu boiler!

(Boiler Huw Warrington wedi torri ar ddydd Nadolig!)

### **Disgyrchiant (20091226)**

Oes gorchwyl fel disgyrchiant? Heb wifrau  
Na ffiniau i'w ffyniant,  
Gwlaw o'r nef a ddaw i'r nant  
Heb blws na minws, mynnant!

(Darllen anrheg Nadolig wrth Katrin; llyfr ar sut i feddwl yn athronyddol am bethau!  
Rhyfeddol nad oes neb yn deall sut yn gwmws mae disgyrchiant yn gweithio)

### **Amser (20091227)**

Dirgelion ymson amser - ni all hyd  
Na lled goelio'i geinder,  
Y cloc 'di celu'i wacter,  
'RHen ystryw o glyw y glêr.

(Pennod arall o lyfr Katrin, yn gofyn "beth yw amser?" )

### **Gwyliau'r Fari (20091229)**

Bydd y lonydd eleni - yn dawel  
Ac yn dywyll hebddi;  
Ond diwyd ei hysbryd hi:  
Gymru! Daw 'fory'r Fari!

(Y Fari Lwyd yn cael hoe yn 2009; "Daw 'fory, cwyd Y Fari!" yn proestio, ond "fory'r" yn achub y bai!)

### **Dagrau'r Doeth (20091231)**

Gwyro cân â geiriau coeth - annwyllo  
Manylion a chyfoeth,  
A rhaid tanbaid y tinboeth  
Yw dechrau dagrau'r doeth.

(Socrates yn dweud ei fod yn gwybod dim o ran gwybodaeth, ond eto i gyd yn cael ei weld yn ddoethur)